

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- मुख्य चुनां आयुक्त होरें जम्मू कश्मीर च तौले गै चुनां करोआने दा जकीन दोआ, उनें आखेआ इस लोकतांत्रिक प्रक्रिया च कुसै गी बी खलल पाने दी इजाजत नेई दित्ती जाग।
- केन्द्री मंत्रिमंडल नै प्रधानमंत्री आवास योजना दे दुए गेड़ गी दित्ती मंजूरी, शैहरी गरीब ते मध्यवर्गिय परोआरें आस्तै 1 करोड़ मकान बनाए जांगन।
- जम्मू पुलस नै 33 करोड़ रपे दी हिरोइन कीती जब्त, 1 तस्कर गिरफ्तार।
- पैरिस ओलंपिक्स च भारती पलोआन अमन सेहरावत होरें मर्दे दे 57 किलोग्राम वर्ग फ्री स्टाइल मकाबले च कैह दा तगमा जित्तेआ।

<><><><><><>

ECI-J&K

जम्मू कश्मीर च तौले गै विधानसभा चुनां बक्खी इशारा करदे होई मुख्य चुनां आयुक्त राजीव कुमार होरें आखेआ जे कुसै बी बाहरी जां अंदरूनी ताकत गी इस लोकतांत्रिक प्रक्रिया च खलल नेई पान दित्ता जाग। कल जम्मू च इक प्रेस वार्ता गी संबोधत करदे होई सीईसी होरें आखेआ जे जम्मू कश्मीर दे लोकें गी चुनां करोआइयै अपनी सरकार देने दा समें आई गेआ ऐ। राजीव कुमार होरें दस्सेआ.....

मुख्य चुनां आयुक्त होरें हालांके चुनां दी तरीकें दा एलान नेई कीता, पर क्यास लाया जा'रदा ऐ जे दिल्ली च सुरक्षा हालातें दी समीखा ते श्री अमरनाथ यात्रा दे समापन मगरा चुनाएं दी तरीकें दा ऐलान कीता जाग। चुनां आयोग दा इक प्रतिनिधिमंडल जम्मू कश्मीर दे त्रै दिनें दे दौरे पर हा ते प्रशासन ते सुरक्षा अर्जेसिएं गी चुनाएं गी लेइयै तैआरिएं दी समीक्षा करने आस्तै राजीव कुमार हुंदी अध्यक्षता च इस प्रतिनिधिमंडल नै कम्म कीता। ध्यानजोग ऐ जे जम्मू कश्मीर च 2014 दे परेंत विधानसभा चुनां नेई करोआए गे न ते सुप्रीम कोर्ट नै जम्मू कश्मीर च 30 सितम्बर 2024 तोड़ी चुनां करोआने दे निर्देश दित्ते न।

<><><><><><>

Cabinet PMAY

केन्द्रीय मंत्रिमंडल नै प्रधानमंत्री आवास योजना शैहरी दे दुए गेड़ दी योजना पीएमएवाई-यू-2.0 गी मंजूरी देई दित्ती ऐ। मंत्रिमंडलै प्रधानमंत्री आवास योजना ग्रामीण गी 2024-25 थमां 2028-29 तगर लागू करने गी बी मंजूरी दित्ती ऐ। कल रातीं मीडिया गी संबोधत करदे होई सूचना प्रसारण मंत्री अश्विनी वैष्णव होरें आखेआ जे प्रधानमंत्री आवास योजना तैहत 3 करोड़ नमें मकान बनाए जांगन। जिंदे च 2 करोड़ ग्रामीण इलाकें च ते इक करोड़ शैहरी इलाकें च बनाए जांगन। एहदे लेई बजट च 3 लक्ख 60 ज्हार करोड़ रपे दा प्रावधान होग। प्रधानमंत्री आवास योजना शैहरी 2.0 तैहत इक करोड़ शैहरी गरीबें ते मध्यम वर्गिय परोआरें गी माली सहायता दित्ती जाग। एह सहायता राज्यें ते केन्द्र शासत प्रदेशें ते प्राथमिक दोहार संस्थानें आस्सेआ मकान बनाने, खरीदने जां शैहरी इलाकें च 5 ब'रे आस्तै किराए पर लैने लेई दित्ती जाग। शैहरी इलाकें च कम्मकाजी महिलाएं आस्तै होस्टल ते आर्थिक कमजोर तबकें ईडब्ल्यूएस, एलआईजी ते एमआईजी गी 4 प्रतिशत सब्सिडी पर 25 लक्ख रपें तस्कर होम लोन लेई गी इस योजना च प्रावधान ऐ। मंत्रिमंडल च संशोधित प्रधानमंत्री जेआई-वैन योजना गी बी मंजूरी दित्ती जेहदे तैहत आधुनिक जैविक ईधन परियोजनाएं गी आर्थिक सहायता दित्ती जाग। सरकार नै राई-बाई ते करसान कल्याण मंत्रालय आस्सेआ प्रस्तावित क्लीयर प्लाट प्रोग्राम गी बी मंजूरी दित्ती ऐ जेहदे च 1 ज्हार 765 करोड़ रपे निवेश कीते जांगन। केन्द्रीय मंत्रिमंडल नै उन्नत जैव ईधन परियोजनाएं आस्तै माली सैहयोग देने आसतै संशोधित प्रधानमंत्री जीवन योजना गी बी मंजूरी देई दित्ती ऐ।

<><><><><><>

CCEA Railways

प्रधानमंत्री नरेन्द्र मोदी हुंदी अध्यक्षता च लाई गेदी आर्थिक मामलें सरबंधी कैबिनेट कमेटी दी बैठका च रेल मंत्रालय लेई अंदाजन 24 ज्हार 657 करोड़ रपें दी लागत आली 8 परियोजनाएं गी मंजूरी दित्ती गई ऐ। इनें परियोजनाएं गी 7 राज्यें दे 14 जिलें च तोड़ चाढ़ेआ जाग।

<><><><><><>

Cabinet SC/ST

सरकार नै साफ कीता ऐ जे एससी, एसटी आरक्षण च संविधान च क्रिमी लेयर दा कोई प्रावधान नेई ऐते आरक्षण दी प्रणाली संविधान मताबक गै होनी चाईदी। एह सफाई सूचना ते प्रसारण मंत्री अश्विनी वैष्णव हुंदी आस्सेआ आई जेहदे च दस्सेआ गेआ ऐ जे एह मुद्दा कल केन्द्रीय मंत्रिमंडल च चर्चा आस्तै चुक्केआ गेआ हा, जिसी एससी, एसटी आरक्षण पर सुप्रीम कोर्ट दे फैसले दे सरबंध च चर्चा दा विषेय बनाया गेआ।

मंत्री होरें आखेआ जे मंत्रिमंडल दी साफ राय ऐ जे एनडीए सरकार बाबा साहब अम्बेडकर हुंदे संविधान च दस्से गेदे प्रावधानें लेई वचनबद्ध ऐ।

<><><><><><><>

PM-Kerala

प्रधानमंत्री नरेन्द्र मोदी होर अज्ज केरल दे वायनाड च राहत, बचाह ते पुर्नवास दे कम्में दा जायजा लैंगन। उंदा कन्नूर जाइयै उत्थुआं वायनाड दे हाडें ते ल्हास पस्सियां पौने कारण प्रभावत इलाकें दा बहाई सर्वेक्षण करने दा बी कार्यक्रम ऐ। मोदी होर आपदा प्रभावत इलाकें दा दौरा करगंन, होए दे नुक्सान बारे जानकारी हासल करगंन ते राहत कैपें च प्रभावत लोकें कन्नै गल्लबात बी करगंन। उंदा अस्पताल जाइयै उनें प्रभावतें कन्नै बी मिलने दा कार्यक्रम ऐ, जिनेंगी बचाह दलें आस्सेआ सुरक्षत बचाया गेआ ते उंदा इलाज चलै करदा ऐ। एहदे बाद प्रधानमंत्री होर इक जायजा बैठक लांगन जेहदे च उनेंगी घटना ते राहत कम्में दे बारे च पूरी जानकारी दित्ती जाग।

<><><><><><><>

President

राष्ट्रपति द्रौपदी मुर्मू होर अज्ज तिमोर लेस्ते दे केई बड्डे नेताएं कन्नै दपक्खी बैठका लांगन। ओह तिमोर लेस्ते दी इक दिनै दी यात्रा पर अज्ज बडलै राजधानी डिली पुज्जियां। उत्थूं दे राष्ट्रपति जोसे रामोस होर्ता होरें डिली अंतर्राष्ट्रीय ब्हाई अड्डे पर आपूं उंदा सुआगत कीता। भारत दे कुसै राष्ट्रपति दी तिमोर लेस्ते दी एह पैहली पैहली यात्रा ऐ जेहड़ी दक्खन पूर्व एशिया च “गोआंटी पैहले” आली भारत दी नीति गी दर्शादी ऐ।

<><><><><><><>

GOC 16th Corps

16 कोर दे जीओसी लैफ्टिनेंट जनरल नवीन सचदेवा होरें राजौरी-पुंछ सेक्टर च नियण रेखा दे कन्नै लगदे अगेत्रे क्षेत्रेंद। दौरा कीता ते सुरक्षा हालतें दा जायजा लैता। इक सोशल मीडिया पोस्ट च व्हाईट नाईट कोर नै दस्सेआ जे जीओसी होरें जीओसी सीआईएफ रोमिया ते जीओसी, एस ऑफ स्पेड सनें एह दौरा लाया। जीओसी होरें शांति ते स्थिर माहौल गी पक्का करने आस्तै सेना दे आपरेशन दी महत्वत्ता पर लोह पाई जेहदे हेठ ओ नेडमे तालेमल ते जज्बे कन्नै दुई सुरक्षा अजेंसिएं कन्नै रलियै कम्म करदे न।

<><><><><><><>

Jammu Narcotics

जम्मू पुलस नै कल बस स्टैंड थमां 33 किलो हिरोइन जब्त करियै इक बड्डी कामयाबी हासल कीती ऐ। इस हिरोइन दी कीमत 33 करोड़ रपे दस्सी जा'रदी ऐ ते इस खेप कन्नै इक संदिग्ध गी बी गिरफ्तार कीता गेआ ऐ। एडीजीपी जम्मू आनंद जैन होरें जम्मू च संवाददाताएं गी दस्सेआ जे इस बारे सूह थोने पर इक पंजाब दा रौहने आले व्यक्ति अखनूर दे बन्ने कन्ने लगदे क्षेत्र थमां बस स्टैंड आवा'रदा ऐ, पुलस ने उसी हिरासत च लेई लैता ऐ। इस शख्स थमां 26 पेकेट बरामद कीते गे जिंदे च तकरीबन 33 किलो हिरोइन ही। मन्नेआ जा'रदा ऐ जे जे इस नशीली खेप गी पंजाब लैता जा'रदा हा। इस सरबंध च नशीले पद्धार्थे दी रोकथाम सरबंधी कनून तैहत पुलस स्टेशन बस स्टैंड च एफआईआर दर्ज कीती गई ऐ।

<><><><><><>

CS-PDS

जम्मू कश्मीर च खुराक सिविल सप्लाई ते उपभोक्ता मामलें सरबंधी विभाग आस्सेआ 98 लक्ख 62 ज्हार लाभार्थिं आले तकरीबन 25 लक्ख 11 ज्हार परोआरें गी मुफ्त ते रियायती दरें पर अन्नदाना उपलब्ध करोआया जा करदा ऐ। इंदे चा राष्ट्री खाद्य सुरक्षा कनून तैहत 66 लक्ख 17 ज्हार लाभार्थिं गी राशन भलेया मुफ्त दित्ता जा'रदा ऐ जदके 32 लक्ख 44 ज्हार लोकें गी बडी गै रियायती दरें पर अन्नदाना उपलब्ध करोआया जा करदा ऐ। मुख्य सचिव अटल डुल्लू हुंदी प्रधानता तैहत कल श्रीनगर च लाई गेदी मैहकमे दी इक जायजा बैठक दरान एह जानकारी सांझी कीती गई। इस मौके इब्बी दस्सेआ गेआ जे फर्जी जां गलत नाएं गी हटाने दी कारवाई दरान 10 लक्ख शा मते नां हटाए गे न ते राशन कार्ड प्रबंधन प्रणाली आरसीएमएस पर मुंतकिल होने उप्पर 67 ज्हार परोआरें गी सार्वजनिक बंड प्रणाली कन्नै जोड़ेआ गेआ ऐ। इक राष्ट्रइक राशन कार्ड नीति बारे एह दस्सेआ गेआ जे प्रदेश च पीओएस उपकरणें राएं अजें तोड़ी 35 लक्ख लैन-देन कीते गे न। इस मौके पर मुख्य सचिव होरें मैहकमे पर जोर पाया जे ओह राष्ट्री खाद्य सुरक्षा कनून दे आंकड़ें च कश्मीरी पंडतें गी बी शामिल करन तांजे उनेंगी बक्ख-बक्ख योजनाएं दे लाह थहोई सकन।

<><><><><><>

LG Charri

उपराज्यपाल मनोज सिन्हा होरें कल श्रावन शुक्ल पंचमी दे पावन मौके पर महादेव गिर दशनामी अखाड़ा श्रीनगर च श्री अमरनाथ छड़ी मुबारक पूजन कीता। इस मौके छड़ी मुबारक श्री अमरनाथ जी, दीपेन्द्र गिरि होर बी मजूद हे।

उपराज्यपाल होरें महादेव भगवान अग्गे मत्था टेकियै सारें आस्तै शांति, खुशहाली ते विकास दी प्रार्थना कीती। सलाना श्री अमरनाथ जी दी यात्रा दे समापन कोला पैहले छड़ी पूजन दी पवित्र रस्म पूरी कीती जंदी ऐ। पारंपारिक छड़ी मुबारक यात्रा मगरा पवित्र छड़ी गी श्री अमरनाथ जी दी गुफा लेता जाग।

<><><><><><>

Budha Amarnath

बन्ने आले जिले पुंछ दी मंडी तैहसील च जारी श्री बुड्डा अमरनाथ जी दी यात्रा लेई अज्ज जम्मू थमां 1 ज्हार 438 श्रद्धालुएं दे जत्थे गी रवाना कीता गेआ। आकाशवाणी दे जम्मू संवाददाता मूजब सख्त सुरक्षा बंदोबस्तें हेठ कुल 32 गड्डिडएं दे काफले च रवाना होए दे इस जत्थे च 888 मर्द, 542 महिला ते 8 बच्चे बी शामिल न।

<><><><><><>

Rural Sanitation

ग्रामीण विकास ते पंचैती राज विभाग दे ग्रामीण स्वच्छता निदेशालय नै द्रोणाचार्य अवार्ड कन्नै सम्मानत कुलदीप हांडु होरें गी कचरे दे खलाफ लड़ाई यानि वार एगेंस्ट वेस्ट नां दी पैहलकदमी लेई दूत दे तौर पर नामजद करने दा ऐलान कीता ऐ। हांडु होर वुशु लेई भारत दे राश्ट्री मुख् कोच न ते कन्नै फिट इंडिया अभियान दे संदेश वाहक बी हैन।

<><><><><><>

Paris Olympics

अमन सहरावत नै कल पैरिस ओलंपिक्स दे इक मकाबले च डेरियन टोई क्रूज गी 13–5 कन्नै हराइयै कुश्ती च भारत लेई पैहला तगमा हासल कीता ऐ। इस जित्त दे कन्नै गै अमन 21 साल ते 24 दिन दी उमर च भारत लेई व्यक्तिगत ओलंपिक्स मेडल जित्तने आले पैहले एथलीट बनी गे न। राष्ट्रपति द्रौपदी मुर्मू होरें भारतीय पलोआन अमन सेहरावत होरें गी पैरिस ओलंपिक्स च कैह दा तगमा जित्तने पर बधाई दित्ती ऐ।

<><><><><><>